

山西通志卷第四十五

山西巡撫都察院右副都御史臣覺羅石麟奉

旨修輯

鹽法

河東鹽產于池池介解州安邑之交薰風自南鹽成昕夕
作味甘鹹功用神速民利賴焉顧所以護池保鹽疏引裕
課之道要在官斯土者本良法美意而力行之庶足以仰
副

朝廷恤商惠農之至意教養先資此其一端未可畧而不講
也志鹽法

河東大鹽池在中條山北麓解州安邑之間近安邑者爲東
池近解州者爲西池名分爲兩實卽一池說文河東鹽池

袤五十一里廣七里周總一百十六里凡池皆水而此池之水其味鹹鱗介不育其性溫隆冬不冰或曰此海眼也蔥嶺之東有海焉曰鹽澤河流所注不溢不涸此池亦名鹽澤是竅於山川生此奧區以粒我烝民唐崔敖曰海眼通波河源伏脉千里一氣瀦爲廣斥是也九有之鹽有煮於海掘於地汲於井積於鹵出於崖出於石出於草木之各殊而此池之鹽則出於種沃水於池種鹽於畦日以晷之雨以潤之風以結之而鹽遂成南有風洞風自洞出爲南風夏月治畦得南風而舉體皆清工人種鹽得南風而所收倍入古名池曰解池以州名也又曰鹽池以鹽名也周禮天官鹽人掌鹽之政令以其百事之鹽有苦鹽散鹽形鹽飴鹽杜子春讀苦爲鹽謂出鹽直用不凍治者

賈公彥疏曰鹽出於鹽池今之顆鹽是也左傳郇瑕氏之地沃饒而近鹽杜預註曰郇瑕河東解縣鹽鹽也猗氏縣鹽池是孔穎達疏曰鹽字從鹽省古聲然則鹽是鹽之名鹽雖是鹽惟此池之鹽獨名爲鹽餘鹽不名鹽也史記貨殖傳猗頓用鹽鹽起註曰鹽鹽河東大鹽是河東池鹽爲鹽鹽無疑鹽者謂池內澆曬之鹽可直食用不須凍治自成顆粒故曰顆鹽而顆粒之大異於散鹽之小故又曰大鹽且大如印累小如珠剖與形鹽同風其水而成皓潔甘美味勝飴鹽柳宗元稱爲國之大寶有以也唐有鹽池十八而河東居其五五池總曰兩池歲得鹽萬斛以供京師宋引池而成者曰顆鹽元立鹽法有因自凝結而取者解池之顆鹽也今兩池

區爲三塲曰中塲曰東塲曰西塲三塲統在一池之內池東西長而南北狹池之離有畦畦分阡陌以爲種治池之中有河河亘東西以資澆灑

女鹽池水經注所謂女鹽澤者是也唐鹽池一十有八蒲州安邑解縣有池五總曰兩池設女鹽監以董西池女鹽之名自此始

周禮天官鹽人女鹽二十人鄭氏注女鹽女奴曉鹽者賈公彥疏以其曉解治鹽有才智則曰女鹽或曰爾雅釋女爲小如女牆女桑之類是也池爲小中之大而以女名以有大池也在解州西北去州治六里許廣袤三十餘里一名硝池解州西北有小池合此爲七女池地據高阜首當中條山谷之下流所瀦客勞爲多溢則水

淡生魚乾則水苦生硝硝本鹽類作味苦澀充食則使人洩利又女池在禁垣之外盜取每易冒鹽賤售猾法碍課是以嚴禁撈採又且勢較東池爲高山谷水漲姚暹渠滿澎湃吞吐東趨禁垣大爲池患垣西築有硝池諸堰以防潰決元時運治移於路村西池始廢明萬歷四十年御史楊州鶴題請開荒澆曬准半報以恤困商尋積水汪洋不可澆曬

六小池者一曰蘇老一曰熨斗一曰夾凹一曰永小一曰賈瓦一曰金井在女池之西北相距數里方長不一其形而最大者水面不過畝餘形如聚星間亦生鹽半爲硝鹺開元以後總稱西池同隸女池監宋崇寧元年解州賈瓦南北團池修治畦眼拍磨布種通得鹽一百七十萬二千七

百餘斤州具以聞後荒棄不治明隆慶四年河東鹽運司開墾解州六小等池照太汾事例印給小票發賣其撈辦入官鹽課當校三年內實收之數酌爲定額接補東池額欠有餘一併補發大同併布政司年例之數仍令運司各官遵照舊制運副駐劄安邑專管東場運同駐劄池南專管南場運判駐劄解州專管西場各鹽該州掌印官協理女鹽等池北岸中場責令運使帶管分守河東道移駐解州監理東西兩池事務將該道原領勅書添載監理解州鹽法字樣換給巡鹽御史亦照長蘆兩淮巡鹽併陝西巡茶事例就近巡歷該管行鹽地方維時大池水溢商無掣支課鮮自出因許各處有力之家隨意封納以時驗放萬歷間御史汪以時垣金井賈瓦永小三池天啟六年御史

黃憲卿又允勤民之請於金井南北地中開荒澆曬比照
壓待商人之例准以每鹽十車五車工本五車自報此亦
同於女池半報義耳其永小賈瓦二池勤民自備工本澆
曬或准一年一更或准三年一更准以三車工本七車挨
次商人帶報每年多寡不等後尋停澆曬

國朝康熙十九年大池水患衆商援例呈請暫開垣西小池
澆曬濟課待大池涸出仍回本號巡鹽御史曾寅疏請從
之巡鹽御史黃斐踵任其後議均地立畦之法務期公普
運使高夢說議得永小池旁計地一百二十二畝五分金
井池旁地七十三畝三分賈瓦池旁地一百八十七畝五
分又東稍地十一畝二分五釐喬家溝有地三十畝四分
蘇老池旁地一十五畝各地共計四百二十九畝九分五

應分之商五百一十三名今議將地分成五百一十三
處每商一名應得池地八分三釐有畸隨照地形長闊方
斜積弓科算務足八分三釐有畸爲率用阜吾民之財五
字每池各用一字挨編五百一十三號每地一處編爲一
號自阜字一號編起池完換字號數頂接至財字五百一
十三號止首承小次金井次賈瓦次喬家溝次蘇老前後
編定造成號冊每號寫造竹籤一枝傳集各商當堂自拈
該課六錠者拈籤一枝十二錠者拈籤二枝拈着字號卽
將商名註定冊上又西池原無牆垣成鹽必皆露積關防
爲難查西禁門相去小池約二十里應將各商收穫之鹽
委場員逐日盤驗登數具報隨督各商運堆西場以候掣
放至康熙二十五年大池水退修葺告完御史勒信

題明停止將所開畦井填塞商歸大池復業永小池周圍四百四十八丈金井買瓦夾西三池周圍一千五百八十丈蘇老池南北長三百零八丈熨斗池南北長二百九十七丈內產硝鹽禁附近居民無得私澆私曬掘挖硝版

禁垣唐司空輿言壕籬者鹽池之隄禁此卽禁垣之意宋募兵百人目爲護寶都以巡邏之後瀕池設有攔馬短牆自安邑縣介村抵解州圍立環合寬廣規池而有加池稱東西二塲分二門以爲捷徑但短垣及肩莫能捍禦明成化十年御史王臣巡鹽河東經理解池塞東西二門另於池北闢中門以總出入又於馬牆之外築禁垣一週二千五百餘堵計長一萬七千四百二十二丈高低隨乎地勢南北垣高丈有三尺基厚如之漸次而上上厚八尺有奇東

西垣高一丈基厚八尺上厚六尺有奇垣之外有馬道以便往來有隍塹以蓄野水深闊皆丈垣內外置舖以居邏卒經理頗爲周詳工未告竣次年御史袁正繼之畢其績仍間有援而入者十二年御史陳鼎崇之至二丈一尺遇圯隨築以補之二十一年御史吳珍請於朝仍開東西二門合中門共稱禁門者三中禁門與運城相對名曰祐寶東去安邑五里者名曰育寶西去解州十里者名曰成寶三塲趨赴各從其便正德十二年御史熊蘭大修禁垣齊其高厚嘉靖十五年雨澤水漲傾者五百八十餘丈御史沈鐸重築完好萬歷四十年御史楊師程革堰戶之名檄行值修州縣集議將禁垣渠堰丈量分工立石表界刊冊永遵

國朝順治五年澆曬工由商僱向置鹽丁無所效用先後汰
存酌照州縣大小共派留用四千名專任修垣分工州縣
一十有三曰解州曰蒲州解州屬邑曰安邑曰夏縣曰平
陸曰芮城蒲州屬邑曰臨晉曰榮河曰猗氏曰萬泉平陽
府屬縣曰太平絳州屬縣曰河津曰聞喜至雍正三年巡
鹽御史馬喀

題請豁鹽丁修築之役禁牆渠堰委運同動帑募夫督理于
是十三州縣之工皆歸運同委員修理

畦地唐崔敖言五幅爲塍塍有渠十井爲溝溝有路梟之爲
畦曬之爲門柳宗元言溝塍畦畹交錯輪囷宋元符四年
開二千四百餘畦百官入賀是池之有畦自唐宋時已然
矣池如仰盤畦居灘際地勢南卑於北畦旁各開水爲港

長與畦等汲引水上畦底如砥邊封爲埂中復留塍以畋分之此治畦之法也明時畦地用官丁撈採鹽入於官

國朝順治六年畦歸於商按課六錠分畦一號一號註一商名原額畦地四百八十五號東場二百四號中場一百四十二號西場一百三十九號中場向有脚道一百五十丈東西池涯各有無碍餘地商人續有開治東開東無碍二十七號中開脚道十二號西開新簽舖三十三號中場每號闊十丈西場每號闊十五丈東場自東無碍至東五舖共一百五十二號皆闊六丈五尺其餘每號闊九丈長無度任商力而爲之不佔水口故無爭也其成五百五十七號除懷慶改食蘆鹽原額九十三號無地行銷無商而荒其現有錠名商畦四百六十四號之中亦荒蕪一百一十

號蓋因鹽法屢弛論錠而不論畦有鹽熟畦坐得銷價無
鹽荒畦亦坐得銷價是荒熟同價人又何肯墾荒而爲熟
哉殊不思三場商畦四百六十四號與額錠二千七百八
十八錠半之數相配錠從畦出畦以錠名有一名之引卽
有一錠之商名有六錠之商名卽有一號之畦地彼畦旣
荒鹽於何出而猶坐收銷價是猶農夫不耕而食也雍正
六年巡鹽御史碩色

題請開荒

勅下部議部覆無商荒畦先動庫銀五千兩給發運使酌量
畦地之闊狹淺深陸續開墾成熟之後商人有補完工本
者卽給爲業其澆曬之商令其各出銷價以補庫項至有
商荒畦令本商各開各畦如無力開墾卽頂與殷實商人

開墾更名報部務令將未墾荒畦漸次成熟使積鹽日盛於

國課民食均有裨益等因奉

旨依議欽此肇工于七年二月竣工于八年四月而庵舍櫛比溝港鱗次胥戴

皇恩而勤澆曬焉

三場原額畦四百六十四號餘畦九十

三號後查出額畦王成業有錠無畦將餘畦補給一號又有額畦地邇淡水將餘畦補給八號今現存額畦四百六十五號餘畦八十四號二其五百四十九號東場十一鋪共畦二百二十八號內額畦二百二十號餘畦八號中場十鋪共畦一百五十七號內額畦一百四十一號餘畦一十六號西場十一鋪共畦一百六十四號內額畦一百四

號餘畦六十號畦頭有河名曰黑河三場澆曬畦地皆汲水於河是黑河者澆曬之源也每年勸商各濬畦頭之河務加深廣毋使淤澱則蓄水多而澆曬不竭矣迄雍正八年巡鹽御史碩色於請墾鹽池荒畦等事案內

題河東行鹽定額其間有額銷不敷州縣許請餘引以濟民食迨餘引雖經請領恐引固有餘鹽或不足是以奏請開荒是有餘引必有餘鹽乃可經久行銷請自雍正八年爲始每年行銷額引之外如有不足酌量具題添發餘引部議應如該鹽政所請將河東所開無商荒畦出產鹽觔於雍正八年爲始在於添發餘引內搭配行銷辦課可也奉旨依議

種治唐時就山海井竈之地置監院游民業鹽者爲亭戶免

雜徭又崔敖曰乃滌塲圃乃完廩倉畢其塲功以謹秋備是唐時已有畦戶宋時墾地爲畦引池水沃之謂之種鹽水耗則鹽成籍戶民爲畦夫官廩給之復其家歲二月一日墾畦四月始種八月乃罷安邑池每歲種鹽千席解池減二十席天聖以來兩池畦戶總三百八十以本州及旁州之民爲之戶歲出夫二人人給米日二升歲給戶錢四萬爲鹽歲百五十二萬六千四百二十九石石五十觔以席計爲六十五萬五千一百二十席席百一十六觔嘉祐時兩池畦戶歲役解河中陝虢慶成民爲之官司旁緣侵削民以爲苦乃詔三歲一貸中間以積鹽多特罷種鹽一歲或二歲三歲以寬其力又減畦戶之半稍以傭夫代之元時每歲五月塲官伺池鹽生結令夫搬攬鹽花其法必

值亢陽池鹽方就或遇陰雨則不能成明以鹽丁撈採
國朝畦歸田種不勞民力而其種治之法仍如舊法歲以二
月一日吐工入池蓋庵治畦淘溝俟風至引水澆曬自二
月以至八月乃罷其種治也先用櫟櫟挹水注於畦之首
段攪之口曝味作挹注次段首段另注新水次段水鹹色
赤挹移三段俟其澄開門塍隅灌四段段段開灌其一二
三段悉以前法挹注俾清流盈科而進極乎南埂而止水
深一二寸乃已經時水而鹽花浮上若凝脂皎雪謂之搗
花以其必擊搗而後成鹽也易說卦曰兌爲澤其於地也
爲剛鹵書洪範水曰潤下潤下作鹹孔穎達疏曰水性本
甘久浸其地變而爲鹵鹵味乃鹹上言曰者言其本性此
言作者從其發見是鹹全在於作搗花者作之之意此種